

De Raaize noar Peries van D.S. Hovinga herdrokt



Restaurant

Koetshuys Ennemaborgh

Op de dag dat Derk Sibolt Hovinga zien 85ste verjoardag viert hebben zol, vief joar noadat e op t zulfde stee de eremedaille in de orde van Oranje Nassau in gold in ontvangst nemen mog, von op zotterdag 22 oktober 1994 in Restaurant Koetshuys Ennemaborgh in Midwolle de prezentoatsie ploats van de herdruk in gebonden vörm van t bouk 'De Raaize noar Peries van twei Oldambtster boeren deur ain van heur verteld, anno 1939, dat eerder verscheen bie oetgeverij Stabo in 1977.

Hovinga schreef t verhoal in dichtvörm noar aanlaaiden van twij raaizen dij e in 1939 noar Peries moakt haar, soamen mit zien neef H.O. Ebens. Tiedens n biezonder sfeervolle bieainkomst rond d'open heerd van t koetshoes van d'Ennemobörög, woar de gasten ontvongen werden mit kovvie en appelgebak mit slagroom en noa t officiële gedailte nog even gezellig noaproaten konden onder t genot van n hapje en n drankje en pioanomeziek van Martijn de Wilde, wer t eerste exemploar van t nije bouk aanboden aan Dr. Jan J. Boer.

De veurzitter van t D.S. Hovingafonds, B.L. Tijdens oet Nij Beerte, huil n inlaaiden, woarin hai vertelde over Derk Sibolt Hovinga as boer en as schriever, t ontstoan van de Raaize noar Peries en de doulstellens van t D.S. Hovingafonds. Hovinga haar testamentair vastlegd, dat t n dail van zien vermogen broekt worden mos veur t instellen van dat fonds. Oet de rente van dat vermogen subsidieert t D.S. Hovingafonds nait allain heroetgoaven van de dichter zulf, mor onder meer ook aander waark, dat oet literair, kultureel en historisch oogpunt veur t gewest Grunnen n rol speelt en n goud gebroek van de Grunneger toal bevördert. In t geval van 'De Raaize noar Peries' het t D.S. Hovingafonds de jonge, energieke oetgeefster Maud Schuurke de meugelkhaid boden, n mooie gebonden oetgoave te moaken op getint pepier, kompleet mit leeslint, illustreerd deur Nynke Hovinga. Eerder kwam bie oetgeverij Meinders in Scheemde n herdruk oet van 'Störm en Stilte', 'Miemern in tweiduustern' en 'Oogst van mien aner laand'.

V.l.n.r.: Maud Schuurke, B.L. Tijdens en Dr. Jan J. Boer.
Foto: Jan Groenbroek.



Veurzitter B.L. Tijdens maarkte op, dat 'De Raaize noar Peries' gain literair hoogstandje is, mor boordevol mit humor zit. Bieveurbeeld:

In t rooie froanieserre Ston zoo'n olderwetse berre

Doar de könk moar toujours

Sluip bie juwver Pompadour.

De Raaize noar Peries is in de boukhandel en bie de Boukenkist te koop veur f 12,50.